



REPUBLIKA E SHQIPËRISË

KOMISIONERI PËR MBROJTJEN NGA DISKRIMINIMI

Nr. 677/2 Prot.

Tiranë, më 07 / 05 / 2021

V E N D I M

Nr. 73, Datë 07 / 05 / 2021

Bazuar në nenin 32/1/a dhe nenin 33 të ligjit nr. 10221/2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi mori në shqyrtim ankesën nr. 75 Regj, datë 23.04.2021, të F. C kundër Drejtorisë Vendore të Agjencisë Shtetërore të Kadastrës (DV ASHK) Pogradec, në të cilën pretendohet për diskriminim për shkak të “gjendjes shëndetësore¹” dhe “moshës²”.

Në përfundim të shqyrtimit të ankesës, Komisioneri për Mbrojtjen nga Diskriminimi³,

K O N S T A T O I:

I. Parashtrimi i fakteve sipas subjektit ankues.

Sipas pretendimeve dhe shpjegimeve të dhëna në formularin e ankesës, shqetësimi i ngritur nga F. C ka të bëjë sërish me problematikën e përsëritur ndër vite pranë KMD-së, lidhur me aplikimin fillestar pranë DV ASHK Pogradec, për t’u pajisur me certifikatë pronësie për pasurinë e fituar me Aktin e Marrjes në Pronësi të Tokës (AMPT) nr. 6381/R, datë 18.05.2005.

Ankuesi infomon KMD-në se, që nga momenti i aplikimit fillestar pranë këtij institucioni, në vitin 2005, dhe deri aktualisht, nuk ka arritur të marrë certifikatën e pronësisë lidhur me tokën në pronësi të tij, pasi nëpunësit e DV ASHK Pogradec e kanë neglizhuar për shkak se është pensionist dhe me aftësi të kufizuar. Ai citon se: “ *Kur shkojmë tek zyrat e DV ASHK Pogradec, duke na parë se jemi pleq dhe nuk kemi mundësi ekonomike për t’i zgjidhur problemet me rryshfet, na zvarrisin lart e poshtë dhe nuk na japin asnjë zgjidhje. Në shkresat e mija drejtuar*

¹ Referuar Dëshmisë nr. 794, të lëshuar nga Shoqata e Invalidëve të Punës së Shqipërisë, rezulton se ankuesi është invalid i grupit të dytë.

² Ankuesi është i datëlindjes 29.09.1947.

³ Në vijim do t’i referohemi me shkurtesën KMD.

institucioneve, ata shprehen për zgjidhje të problemit tim por nuk po i jepet zgjidhje përfundimtare. Me shkresën e fundit me nr. 3857/2 prot., datë 08.06.2020 i jam drejtuar sërish ASHK Tiranë, dhe në përgjigje të saj ASHK-ja i është drejtuar DV ASHK Pogradec për të zgjidhur problemin tim. Në dosjen time ka shumë akte që lidhen me çështjen time. Duke mos ditur kujt t'i drejtohem tjetër, për të zgjidhur këtë problem timin kërkoj nga ju të shqyrtoni kërkesën time”.

Në përfundim të parashtrimeve, subjekti ankues ka kërkuar nga Komisioneri hetimin e kësaj çështjeje, rekomandimin e DV ASHK Pogradec të ndalojë diskriminimin ndaj tij, si dhe të zgjidhet problemi për regjistrimin e tokës.

II. Nga shqyrtimi paraprak i ankesës, u konstatua se:

Në nenin 1 të ligjit nr. 10221, datë 04.02.2010 *“Për Mbrojtjen nga Diskriminimi”*, të ndryshuar, përcaktohet se: *“Ky ligj rregullon zbatimin dhe respektimin e parimit të barazisë dhe mosdiskriminimit në lidhje me racën, etninë, ngjyrën, gjuhën, shtetësinë, bindjet politike, fetare ose filozofike, gjendjen ekonomike, arsimore ose shoqërore, gjininë, identitetin gjinor, orientimin seksual, karakteristikat e seksit, jetesën me HIV/AIDS, shtatzëninë, përkatësinë prindërore, përgjegjësinë prindërore, moshën, gjendjen familjare ose martesore, gjendjen civile, vendbanimin, gjendjen shëndetësore, predispozicionet gjenetike, pamjen e jashtme, aftësinë e kufizuar, përkatësinë në një grup të veçantë, ose me çdo shkak tjetër”.*

Diskriminimi përkufizohet nga ligji nr. 10221/2010 *“Për Mbrojtjen nga Diskriminimi”*, të ndryshuar, në nenin 3, pika 1, si: *“Diskriminim” është çdo dallim, përjashtim, kufizim ose preferencë, bazuar në cilindo shkak të përmendur në nenin 1 të këtij ligji, që ka si qëllim ose pasojë pengesën ose bërjen të pamundur të ushtrimit në të njëjtën mënyrë me të tjerët të të drejtave e lirive themelore të njohura nga Kushtetuta e Republikës së Shqipërisë, aktet ndërkombëtare të ratifikuara nga Republika e Shqipërisë, si dhe nga ligjet në fuqi”.*

Në bazë të nenit 7, të ligjit nr. 10221/2010 *“Për Mbrojtjen nga Diskriminimi”*, të ndryshuar, mbrojtja nga diskriminimi garantohet ndaj çdo veprimi ose mosveprimi të autoriteteve publike ose të personave fizikë a juridikë që marrin pjesë në jetën dhe sektorët publikë ose privatë, që krijojnë baza për mohimin e barazisë ndaj një personi apo grupi personash, ose që i ekspozon ata ndaj një trajtimi të padrejtë dhe jo të barabartë, kur ata ndodhen në rrethana të njëjta ose të ngjashme, në krahasim me persona të tjerë ose grupe të tjera personash.

Mbështetur në detyrimet ligjore të parashikuara në nenin 3 të Kushtetutës të Republikës së Shqipërisë në të cilën shteti merr masa për mbrojtjen e dinjitetit të njeriut dhe respektimin e lirive dhe të drejtave të tij, nenit 14 të Konventës Evropiane të të Drejtave të Njeriut, Ligjin nr. 10021, datë 04.02.2010 *“Për Mbrojtjen nga Diskriminimi”*, të ndryshuar, Komisioneri për Mbrojtjen nga Diskriminimi synon respektimin me rigorozitet të parimit të barazisë përpara ligjit, barazi të

shanseve dhe mundësive për të ushtruar të drejtat dhe liritë, si dhe zbatimin e efektshëm të politikave antidiskriminuese.

Nga shqyrtimi paraprak i dokumentacionit të depozituar nga ankuesi pranë KMD-së, konstatohet se:

Së pari, lidhur me pretendimin e ankuesit për diskriminim nga ana e DV ASHK Pogradec, sa i takon mosdhënies së certifikatës së pronësisë dhe njohjes së tij si pronar i ligjshëm i pronës, Komisioneri vlerëson se:

- Nga verifikimet e kryera rezulton se pretendimet e parashtruara nga ankuesi janë shqyrtuar nga KMD, në kuadër të tri ankesave të mëparshme, për të cilat Komisioneri është shprehur me tre vendimet respektive, si dhe nuk është depozituar asnjë provë apo fakt i ri për të filluar trajtimin e një çështjeje, shqyrtimi i së cilës për më tepër ndodhet jashtë kompetencave që LMD i atribuon Komisionerit. Kështu:
 1. Nëpërmjet Vendimit nr. 87, datë 05.07.2019, Komisioneri ka vendosur mospranimin e ankesës me nr. regj. 74/2019, pasi ankesa ishte depozituar jashtë afateve ligjore dhe për shkak se *“e drejta për regjistrimin e pronës bën pjesë në kompetencën e ZQRPP ose zgjidhet në rrugë gjyqësore”*.
 2. Nëpërmjet Vendimit nr. 79, datë 30.07.2020, Komisioneri ka vendosur mospranimin e ankesës me nr. regj. 81/2020, me arsyetimin se e njëta çështje, me të njëjtin objekt, të njëjtat shkaqe të pretenduara dhe kundër të njëjtave subjekte ishte shqyrtuar në kuadër të një ankese të mëparshme të sjellë prej tij dhe se për të ishte dhënë një vendim i mëparshëm dhe nuk kishte të dhëna të reja.
 3. Nëpërmjet Vendimit nr. 54, datë 01.04.2021, Komisioneri ka vendosur mospranimin e ankesës me nr. regj. 41/2021, me arsyetimin se e njëta çështje, me të njëjtin objekt, të njëjtat shkaqe të pretenduara dhe kundër të njëjtave subjekte ishte shqyrtuar në kuadër të një ankese të mëparshme të sjellë prej tij dhe se për të ishte dhënë një vendim i mëparshëm dhe nuk kishte të dhëna të reja.

Për sa më sipër, Komisioneri, mbështetur në nenin 33, pika 4/c e LMD, të ndryshuar, i cili përcakton se: *“Ankesa nuk pranohet nëse e njëjta çështje është duke u shqyrtuar në kuadër të një ankese tjetër ose për të është marrë një vendim i mëparshëm dhe nuk ka të dhëna të reja”*, gjykon se pretendimet e ankuesit për diskriminim nga e DV ASHK Pogradec nuk mund të pranohen për shqyrtim.

Së dyti, lidhur me pamundësinë financiare të ankuesit për të ndjekur gjyqësisht çështjen e pajisjes me certifikatë pronësie për pasurinë e fituar me Aktin e Marrjes në Pronësi të Tokës (AMPT) nr. 6381/R, datë 18.05.2005, Komisioneri, ka ndërmjetësuar me *“Shërbimin Ligjor Falas”* (TLAS)

që kjo organizatë ta asistojë me ndihmë ligjore⁴ ankuesin lidhur me ndjekjen e çështjes së tij gjyqësisht.

Për sa më sipër, bazuar në nenin 33 pika 4/c/ç, të ligjit nr. 10221/2010 “Për Mbrojtjen nga Diskriminimi”, të ndryshuar, parashikohet shprehimisht se: ankesa nuk pranohet nëse: “është e papajtueshme me dispozitat e këtij ligji”, çështja e parashtuar nuk mund të shqyrtohet më tej, pasi Komisioneri është shprehur me vendime të mëparshme për të njëjtat pretendime të ankuesit.

PËR KËTO ARSYE:

Mbështetur në nenin 20/1, nenin 32, pika 1/a, si dhe nenin 33, pikat 1, 4/c/ç dhe 10 të ligjit nr. 10221/2010 “Për Mbrojtjen nga Diskriminimi”, i ndryshuar, Komisioneri për Mbrojtjen nga Diskriminimi,

V E N D O S I:

1. Mospranimin e ankesës së shtetasit F. C, pasi nuk plotësohen kriteret përkatëse të parashikuara nga ligji nr. 10221/2010 “Për Mbrojtjen nga Diskriminimi”, i ndryshuar.
2. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijani e këtij vendimi.

KOMISIONER

Robert GAJDA

Fusha: Të mira dhe shërbime
Shkaku: Mosha, gjendja shëndetësore
Lloji i vendimit: Mospranim

⁴ SHËRBIMI LIGJOR FALAS TIRANË (TLAS), Rruga: “Bajram Curri, Pall Agimi, Shk. 18, Ap. 322, Tiranë, Tel: 042258442.